



Para yagdó

Para yagdó ta masha remarkabel. Bo ta mir'é den laira ayá ta sirkulá riba koriente di airu preparando pa bula bini abou di ripiente. Ta fásil pa rekonos'é, na su pik masha skèrpi, su klouchinan skèrpi skèrpi i mayoria di biaha su alanan enormemente grandi.

Rònt mundu tin para yagdó, aparte di na Antárktika. E nòmber para yagdó ta zona poko negativo ora ta papia di para tan bunita. Otro nòmber ta kibradó di wesu i para di rapiña. Den gremio ofisial ta yama nan tambe para ku ta gara. Esaki ta pinta kon e para ta gara su presa, esta ku su patanan.

Para yagdó ta importante pa ekilibrio den naturalesa. E ta yag bestia ku ta débil òf malu. No ta fásil pa kue animal fuerte. Komedó di bestia morto, manera warawara, ta un tipo di para yagdó ku ta pèkurá pa kome kita bestia morto (as).



Mas information di e departimentu di NME
(Natuur en Milieu Educatie) di Carmabi riba:

Wèpsait: www.carmabi-educatie.org

Facebook: [carmabi NME education](https://www.facebook.com/carmabi-NME-education)

Instagram: [carmabi nme](https://www.instagram.com/carmabi_nme)





Diferente famia


E famia di para yagdó ta konsistí di diferente rasa. Ta bon pa nos identifiká nan pasobra no ta tur biaha hende ta kategorisá nan korektamente.

1. Falki

Falki ta mayoria di biaha yagdó di para, ke men su presa ta para. E por pèrsiguí su presa distansia largu. Falki por bula masha lihé, asta 180 km pa ora. Bo ta hañ'é prinsipalmente riba tereno vasto, kaminda e tin espasio pa yag.

2. Gabilan

E tipo di para akí ta sprent masha bon. Su spesialidat ta pa sali di sorpresa for di su lugá di skonde pa ataká su presa. E tipo di para akí tin ala anchu i rabu largu.



Bo sa ku...?

Pa muchanan ku ta interasa por haña informashon riba nos wèpsait.

Tambe bo por bishitá nos Marine Education Center na Carmabi Piscadera!

3. Águila

Águila ta spesialisista den zuefmentu i p'esei e por bula distansia largu. E ta usa entre otro térmika, bientu ku ta subi vertikalmente, por ehèmpel kantu di seru. Águila tin ala anchu largu i rabu kòrtiku. Pa motibu di esaki e no ta ekipá pa sprent. Ta ku su klouchinan fuerte i duru e para akí ta mata presa.

4. Oura / Komedó di bestia morto

E paranan famoso akí ta pertenesé na e grupo di komedó di bestia morto. Nan sistema di digestion ta bon hinká den otro. Tambe su olfato ta sumamente bon desaroyá, pa por hole kadaver di distansia leu. Ala di oura ta anchu ku un embergadura di ala masha grandi. Esaki ta strob'é di bula vertikalmente den un bulá. (Ta prèt pa mira esaki, ya ku e tin ku balia kokochá promé di tete subi bai laira.)

5. Palabrua

Palabrua ta yag prinsipalmente ora ta sukú (ounke tin algun tipo ku ta yag den dia tambe). Mayoria di tipo di palabrua ta yagdó spesialisá riba raton. Uhu europeo sí por kue presa mas grandi manera has. Despues di a kome henter e presa, palabrua den su paden ta komprimí kabei, pluma i wesu chikí di e presa den un bala ku e ta saka. Un bon manera pa haña sa unda tin palabrua ta ora di buska bala di palabrua.



Para yagdó na Kòrsou

Na Kòrsou tin 4 tipo di para yagdó ku ta brui i tin 3 (òf mas?) tipo ku ta bishitá nos isla regularmente di tránsito. Solamente un di esnan ku ta brui aki ta yag anochi, esta palabrua. Di dia nos por mira warawara, kinikini i gabilan (falki). Un di e bishitantenan ta gabilan piskadó.

Para

Para ta pertenesé na e grupo di vertebrado, meskos ku piská, rèptil, amfibio i mamal. Pues para tin skelèt interno ku wesu di lomba. Para ta di sanger kayente i e tin pluma pa mantené e calor.



puitu di warawa

E para embra ta pone webu den nèshi i ta e ta brui nan normalmente. Algun tipo di para, ta mama ku tata ta brui huntú. Ora puitu sali for di webu e ta dependé kompletamente di su mayornan. Nan ta dun'é di kome i kalor te ora e ta sufisientemente grandi pa kria su mes.



Bo sa ku...?

- Warawara ta preferá kanamentu riba bulamentu. Ora e ta sinta kome un kaminda i otro animal ta strob'é e ta kana kore limpi bai. Ta te ora e no por skapa mas, e ta bula lanta bai.

- Para yagdó manera warawara i falki hopi biaha tin miedu di para manera chuchubi i asta blenchi. E paranan chikitu akí ta defendé nan nèshi masha bon i nan ta kore ku para yagdó ora esaki ta yega muchu serka di e nèshi.

Maske para yagdó ta duna un impreshon agresivo, e no ta ètòl.



Kinikini

E nòmber sientífiko di kinikini ta *Falco sparverius*. Na hulandes nan ta yam'é Amerikaanse torenvalk i na ingles American kestrel.

Kinikini no ta grandi, e tin e tamaño di un prikichi grandi. Rònt Kòrsou bo ta mir'é, sea den mondi òf den bario. Ora di bula su rabu largu i alanan puntá ta sobresalí. Su koló ta maron kòrá. Ta fásil pa distinguí machu for di embra. Machu tin ala shinishi blou. Embra ta un tiki mas grandi ku machu i su alanan ta mas strepiá. Otro karakterístika ta ku na su band'i kara por mira pia di barba, esta plèki pretu.

Kinikini ta yag mas tantu riba lagadishi, raton, tòr i para chikí. Tin biaha e ta kue dalakochi. E gusta sinta na mirador altu, manera dak, pal'i lus i palu.

Ora di bula e por bira ala di tal manera ku e por keda kologá den laira pa tin bon bista di su habitat. E kologamentu den airu akí nos ta yama 'resamentu'.

Durante su baile seksual e ta duna show spektakular i na mesun momentu e ta grita duru. Kinikini ta hasi uso di buraku den kueba pa traha nèshi, kaminda e ta pone 3 pa 5 webu. Puitu ta sali despues di mas o ménos 30 dia. Ora beibi tin un luna asina e ta bula sali for di nèshi.





Warawara

E nòmber científiko pa warawara ta *Polyborus plancus*. Na hulandes i ingles ta yam'é caracara. Ta haña e para yagdó akí prinsipalmente na Bándabou. Warawara ta hopi mas grandi ku kinikini. Ta fásil pa rekonos'é ora di bula. E tin un bulá poko sokete. Su garganta ta largu istrèk, su pik ta relativamente pisá i ora di bula bo ta ripará ku su alanan ta ku djente di zag.

Su koló ta maron, su koko i pechu ta krèm i e ta bisti un pèchi maron skur. Su barika ta pintá maron ku blanku i riba su rabu bo ta mira strepi duars. Remarkabel ta su kueru sunú kòrá entre su wowonan i pik.

Warawara ta kome prinsipalmente bestia morto. E kueru sunú kòrá t'ei pa evitá ku pida karní putrí ta keda kologá meimei di su alanan. E koló di warawara ta indiká kon e ta sinti. Mas kòrá su kueru ta, mas eksitá e animal ta.



Warawara ta e para nashonal / símbolo di Mexico, meskos ku Merka tin su Eagle. Na spañó ta yama warawara gabilan. E ta konosí komo The Mexican Eagle tambe.

E para akí ta masha útil pa nos, pasobra e ta kome bestia morto, kita nan for di kaminda.

Ta un biaha pa aña so, warawara ta brui, ounke ta konosí ku tin sierto kaso kaminda el a brui dos bes pa aña. E ta pone 2 pa 3 webu. Despues di mas o ménos 28 dia puitu ta sali. Despues di un luna i mei, dos luna, beibi ya por bula sali for di nèshi. Por rekonosé e paranan hóben na nan koló, ku ta hopi mas kla ku esun di nan mayornan.

Su habitat ta kore di Arizona, Texas, Mexico te ku Suramérica. E por yega 50-60 cm di altura i e por span ala te mas o ménos 120 cm, midí di tòp di un ala pa tòp di e otro. E ta para riba lista di animal menasá desde ougùstùs 1987.



Boletin informativo

Gabilan piskadó

Pandion haliaetus ta su nòmber científiko. Na hulandes ta yam'é visarend, na ingles osprey. Bo ta haña e para akí prinsipalmente kantu di laman i den bahia (manera banda di Nieuwe Havenweg).

Su alanan ta largu ku djente di zag, su barika ta blanku i ora e bula bo ta ripará ku e tin plèki pretu na su alanan. Su koko ta blanku meskos ku su frònchi i un strepi pretu ta kore duars di su wowonan.

Mirá di ariba su koló ta maron skur. E ta yagdó di piská. E ta bula baha vertikalmente kabes abou, anto nèt na belumbe e ta manda strèk su klouchinan pa dilanti pa gara e piská. Den e moveshon akí e para por disparsé bou di awa. Unabes el a gara e piská ei e no por hala su patanan aden.

Ku su presa e ta bula bai kantu di laman kaminda e ta skam'é i kom'é. Nos ta mira mas tantu gabilan piskadó den temporada di tránsito, ku ta di novèmber pa febrüari, ounke tin algun ku nos por mira sobrá di aña tambe. E no ta brui aki.

Gabilan piskadó ta brui den su pais di prosidensia, manera Canada i algun estado na nort di Merka. Ora di brui e ta pone 2 pa 4 webu, ku ta sali despues di mas o ménos 40 día. Pasobra tin un pa dos día entre kada webu, tin un diferensia den forsa i grandura di e chikitinnan. Hopi biaha ta pone mas webu pa asina garantisá ku tin kuminda di reserva pa e yunan fuerte.

Lamentablemente esaki ta enserá ku e yu fuerte ta kome su ruman mas suak.



Bo sa ku...?

Palabrua ta kome su presa tur tur i e ta saka e pidanan indigestibel hewon asina?

Bala di vómto ta konsistí pues di pluma, wesu i kabei. Ora bo haña kabes di karpachi den tal bala, bo sa kiko e palabrua tabatin komo dieta





Boletin informativo

Falki

Su nòmber científiko ta *Buteo albicaudatus*, na hulandes witstaartbuizerd i na ingles white-tailed hawk. E para akí ta skars na Kòrsou. E tin mester di un habitat enorme pa yag, brui i biba. Nos isla ta muchu chikí p'e. Ke men tin dos, tres pareha so.

Ora bo ta detektá falki den laira, loke ta resaltá ta su alanan istrèk rondó. Koló di su alanan ta shinishi skur, ku maron na e parti ariba. Su barika ta blanku. Kada para tin un patronchi úniko na su barika. Bo por rekonosé kada para na e patronchi ei. E ta mané un sédula. Loke tambe ta resaltá ta su rabu blanku ku su zòm pretu.

Falki ta yagdó di konènchi, para (prinsipalmente palomba) i lagadishi.

E para akí ta preferá konstruí su nèshi te ariba den káktùs di pilá. E ta usa taki ku sumpiña mesklá ku yerba seku.



Bo sa ku...?

e tipo di palabrua 'shoko' (*Athene cunicularia*) ta endémiko na Ruba? Ke men ta na Ruba so por haña e para akí, no na niun otro isla. Na hulandes su nòmber ta holenuil, na ingles cave owl. E tin koló di mespu ku hopi plèki blanku. Su wowonan ta grandi i tin un koló hel remarkabel. Kontralí na mayoria di palabrua ta ku e palabruita akí ta masha aktivo parti mainta i parti anochi. Parti mainta e ta yag insekto sobretodo i anochi ta raton e ta kue.

E mes ta koba hòl den suela. Meskos ku nos, hende, e tambe gusta sinta pariba di kas, e diferencia ta ku shoko ta traha su pòrch ku pupu di otro bestia. E pupu ta atraé tòr di mèst. Shoko ta kue kome e insektonan akí. E palabruita ta pone 6 pa 9 webu, ku ta sali despues di 28 pa 30 dia. E yunan ta bula sali for di nèshi despues di 7 pa 8 siman.



Palabrua

Su nòmber científiko ta *Tyto alba bargei*. Na ingles ta barn owl i na hulandes kerkuil. E para akí ta animal di anochi. Bo no ta hañ'é mir'é fásilmente. Ora e bula e no ta hasi kasi niun zonidu. E karakterístika akí ta yuda bon ora e yag pa kue raton, djaka i otro animal di anochi. E sekreto tras di su bista ekselente ta e grandura i konstrukshon di su wowonan. Nan dos ta situá na parti dilanti di su kara ku ta kousa ku e por mira tres-dimenshonalmente. Tambe e por distinguí kada detaye, anto su wowonan ta kapta tur chipichipi di lus.

Palabrua su oido ta ekstraordinario tambe. E ta tende kada birá di presa. Na Kòrsou i Boneiru nos tin un di e supspesienan mas chikí di palabrua. Nos para no ta midi mas ku 28 cm di largura. Si bo tin e suerte di mira palabrua bula anto tin lus bou di dje, bo ta mira su barika blanku bunita ku pikpik skur. Su koló di lomba ta bròns. Loke ta resaltá ta su kara forma di kurason.

Bo ke haña sa mas di para yagdó?

Purba di haña informashon riba internet tokante lo siguiente.

- Para yagdó ta pertenesé na e grupo di vertebrado (animal ku wesu di lomba)
- Para ta di sanger kayente, meskos ku mamal. Esaki ta nifiká ku semper e tin mes temperatura di kurpa (hende tin mas o ménos 37,5 grado Celsio)
- Para yagdó ta karnívoro (komedó di karni). Ora e mes no ta kue e animal, pero ta kome e ta kome bestia morto so, nos ta yam'é 'komedó di bestia morto' (aaseter na hulandes)

Éksito ku buska- i lesamentu di mas informashon.



Su kaminda pa brui bo ta haña mas tantu den muraya di baranka i / òf den kueba di terasa di kalki. Den su bala di vómito bo por deskubrí tur e restunan indigestibel di su presanan, manera pid'i wesu, pluma i kabei. Palabrua ta yag mayoria di biaha djaka i raton, pero tin biaha para chikí i raton djanochi tambe. Proménan ayá el a konstruí nèshi riba sòlder di kas. Awendia no mas, pasobra hende ta sera dak kompletamente pa niun bestia no dreña.

Palabrua ta pone 5 pa 7 webu, ku ta sali despues di 32 pa 34 dia. E yunan ta bula sali for di nèshi ora nan tin mas o ménos 7 siman i mei di edat.